

14. april 2015

Upernaviup eqqaani nunaqarfimmi Kullorsuarmi timersortarfiliornissamut Naalakkersuisut AIS 2016-mut 25 mio. koruninik immikkoortiteqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Hans Enoksen, Partii Naleraq)

Inatsisartunut ilaasortaq Hans Enoksen Partii Naleqqameersoq Siumumiit qutsavigaarput Kullorsuarmi timersortarfiliortoqarnissaa siunertaralugu siunnersuutaanut.

Nunatsinni meerartagut, inuusuttagut aammalumi inersimasortagut timersornikkut piginnaasaat tupinnaanartumik annertupput. Tamannalu ilutigalugu isumaqarnarpoq timersornikkut periarfissat piffiit ilaanni suli ullumikkornit pitsaanusumik periarfissiuunissaat politikikkut annertunerusumik aqquissiuuneqartariaalersoq.

Siumumiit isumaqarpugut timersortarfiit pioreersut avataasigut timersorfissanik nutaanik ineri-saajuartariaqartugut, tamannalu anguniartariaqartoq sumi najugaqartuuneq apeqqutaatinnagu. Illoqarfiit tamarluinnarmik maanna timersortarfeqartiterput timersortarfeeraqarlutilluunniit, tamannalu soorunami nuannaarutissaavoq annertoq, taamaasillunimi innuttaasut meeqqaniit utoqqarnut timersornikkut periarfissaqartinneqarnerat minnerpaaffissalerneqarnikummat.

Nunaqarfiit arlariit maanna timersortarfeqartut ilisimavarput, taamatullu nunaqarfiit ilaannut timersortarfeqarnikkut ineriartortitsisimaneq pitsaasuvoq, taamaattumillu nunaqarfinnut suli timersortarfeqanngitsunut ineriartortitsisinnaanernik tikkuuseqataallutik.

Soorlu siunnersuuteqartup erseqqissaatigigaa nunaqarfik Kullorsuaq inuttusiartorpoq inuussutissarsiornikkullu ineriartornissaminut periarfissarissarluni. Siumumilu tamanna aamma assortornagu isumaqatigaarput.

Nunatta issittumi inissisimaneq eqqarsaatigalugu ukioq kaajallallugu timersorfiusinnaasunik piffiit amerlanerpaat pilersitsiortuiffiginissaat pilersaarusiortariaqaripput Siumumiit isumaqarpugut, tamannalu kommuunit qanimut peqatiginerisigut anguneqarsinnaasoq Siumumiit isumaqarluta. Timersortarfiimmi maanna pioreersut eqqarsaatigigaanni timersornerinnarmut atornagit aammattaq sunngiffinni sammisassanut allanut atorluarneqartarnerat eqqarsaatigisariaqarparput.

Siunnersuummut uunga tunngatillugu Kullorsuarmi timersortarfiliorsinnaanernik isuma kommu-nimiittoq Siumumiit oqaatigerusupparput, tassungalu tunngatillugu Qaasuitsup kommuniani sanaar-tugassat eqqarsaatigalugit kissaatini ilaannginnera aamma maluginiarsimallutigu.

Taamaattumik Kulturikkut ingerlatsineq sunngiffimmilu sammisassaqartitsineq pillugit Inatsisartut peqqussutaanni aalajangersakkat tunngavigalugit siunnersuutip massumap kommunimiit suliari-neqarnissaa Siumumiit pissusissamisoortutut isumaqarfigaarput.

Kommuunilli ukiuni makkunani aningaasaqarnikkut ilungersunartumi inissisimaneq eqqarsaatiga-lugu Siumumiit soqutigalugu eqqartuiffigeqataarususaqarput siunissami siunertanut taamaattunut aningaasalersueriaatsit qanoq ittut inuiaqatigiinni pisariaqartinnerigut oqaloqataaffigissallugu.

Naalackersuisooqatigiinissamilu isumaqatigiissummi ilaatigut allassimavoq ”*Inuit tamarmik peqataaffigisinnaasaat timersuutit tamanut ammasuunerat pissusissamisoorpoq, taakkulu illoqarfinni nunaqarfinnilu 200-it sinnerlugit inoqartuni timersortarfinni imaluunniit timersortarfeeqqani sammisarinissaannut sinaakutissat pisariaqartinneqartut pilersinneqassapput*”. Naalackersuisooqatigiinnermut isumaqatigiissummi 2014-2018 taama allassimasoqarpoq, taanalu toqqammavigalugu tamanut ammasumik timersornerup nunatsinni tamani ineriartortinneqarnissaa aqutis-siunneqassaaq.

Taamatut Siumumiit oqaaseqarluta siunnersuut itigartitsissutigineqassasoq inassutigaarput.